

Sot në ditën e premte që njihet si dita më e madhe e javës për besimtarët myslimanë, përveç faljes është zhvilluar dhe një aksion për dhurim gjaku për fëmijët talasemikë.

Imami Xhamisë së rrugës së Kavajës, Ahmed Kalaja, gjatë ligjëratës së tij, shprehu nevojën që këta fëmijë kanë për dhurim gjaku, duke e mbështetur në thënien Kuranore: "Kush shpëton një jetë sikur të ketë shpëtuar gjithë njerëzimin...".

Kjo nismë është nisur në të gjithë xhamit e Tiranës, si nismë e Komunitetit Mysliman dhe pritet të shtrihet më gjerë.

Qindra besimtarë i janë përgjigjur kësaj thirrje për t'u ardhur në ndihmë fëmijëve talasemikë.

Më parë edhe Komiteti Shtetëror për Kultet ka zhvilluar një fushatë për dhurimin e gjakut së bashku me të rinj nga komunitetet fetare ku përveç dhurimit të gjakut, ky gjest shpreh bashkëpunimin dhe harmoninë që kanë komunitetet fetare në vendin tonë.

Rreth 60 besimtarë dhuruan gjak sot dhe pritet që të premtet e ardhshme numri i tyre të shtohet. Veprimi i tyre është vlerësuar shumë nga Qendra e Dhurimit të Gjakut, duke u shprehur se kjo është një ndihmë e rëndësishme që jepet për jetën e këtyre fëmijëve.

Nuk është hera e parë që komunitetet fetare kanë ofruar bashkëpunim të ngushtë me qendrat e dhurimit të gjakut./shekulli/